

TE HEHEURAA API

I neia i te piha neneiraa na te Ekalesia a Iesu Mesia i te Fēia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoē.

Nu. 1.

Tenuare 1930.

Mat. 24.

*Ua tuu mai hoi oia i te ture e mai te mea aita e ture, aita
atou e utua; e mai te mea aita e utua, aita atoa e faahaparaa;
e mai te mea aita e faahaparaa e roaa ia ratou te aroha rahi
o Tei Mo'a i Iseraela nei, na roto i te taraehara; ua faaora-
hia hoi ratou e to'na ra mana. (2 Nephi 9:25)*

I Te Mau Hoa O Te Heheuraa Api.

Ia ora na ontou i te aroha mau o to tatou Fatu o Iesu Mesia.

Ua tae te tau no te Matahiti Api, e mea tia ia faaea rii e ia feruri rii i to tatou huru i te matahiti i mairi a'enei. Mai te mea e, e feruri tatou ma te manaó tia, e riro tatou i te parau ma te reó hoé, ua rahi ta te Atua haamaitairaa ia tatou nei, e e mea iti ta tatou ohipa i rave no te haamaurururaa Ia'na.

I roto i teie nei matahiti api, e mea tia roa ia tatou ia haapapu i to tatou manaó ia haapao i Ta'na mau faaueraa ei faaiteraa Ia'na e, ua mauruuru tatou i te mau haamaitairaa Ta'na i horoa mai ia tatou. Ia na reira tatou e rahi roa'tu te haamaitairaa e fariihia e tatou no o mai i Te Atua ra.

Ia vai noa te haamaitairaa o te Atua i nia iho ia outou e hope roa'e i teie nei Matahiti Api, o te hinaaroo ia o to outou hoa.

Te Heheuraa Api

E Rata i te Mau Tuahine.

Te mau tuahine no te mau Pupu Tuahine Faaora, ia ora na outou:

Ua hinaaro yau ia farerei i te mau Pupu Tuahine i te mau Amaa atoa, aita râ i nehenehe, no reira, te faaite atu nei au i to'u manaó na roto i teie nei vea.

Te haamata nei tatou i te hoé matahiti api, e e taime maitai ia i te haapapu i to tatou mau manaó, ia rave-puaihia te ohipa, e ia maitai aé to tatou mau Pupu Tuahine, e tatou iho, e to tatou mau utuafare. E ohipa rahi ta te mau vahine i nia i teie nei ao. Ua tuu mai te Atua i to'na mau tamarii i roto i to tatou mau rima, e mai te mea e, e haapao tatou i te ohipa i tuuhia mai ia tatou, e riro ia, ei ohipa maitai, e e haamaitaihia tatou e te Atua.

Tei ia tatou, te mau vahine, te faatereraa i te mau tamarii i te pae rahi o te taime, e ua nehenehe ia tatou i te tauturu ia ratou ia riro ratou ei mau tamarii maitai e te faufaa atoa hoi, e ia riro atoa ratou ei haamaitairaa ia tatou na roto i ta ratou mau ohipa. A api noa'i ratou, e mea tia ia tatou i te haapii ia ratou i te faaroo i te Atua, e i te aroha ia'na e ta'na ra Evanelia. A haapii ia ratou i te mau peu ma, e te parau tia, e te haavare ore, e te itoitoto atoa hoi, e e riro to outou mau tamarii ei tauturu i te Ekalesia e i to ratou mau taata tupu.

Tei roto i to tatou mau rima te hamaniraa o teie ui taata i mua nei. Ia rave maitai tatou i teie ohipa e tia'i. A haamata i teie nei. Eiaha e tia no ananahi. a haamata râ i teie nei i te haapii i te mau tamarii i te Evanelia e te mau peu maitai.

Ia haamaitai te Atua i te mau vahine, ia tauturu maitai ratou i te ohipa a te Fatu ia tupu i te rahiraa. O ta'u ia pure.

Papaiahia e Matarita

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo
tei papaihia e Tamate Aposetolo; Faaauhia ei reo Tahiti e Elita.

*HIRO'A 10. Te faaroo nei matou e ***** E faaapîhia
hoi te fenua nei, e e faahoîhia mai te hanahana o to'na huru
paradaiso ra.*

(E tuatiraa teie nei parau.)

TE FAAAPIRAA E TE TIA-FAAHOU-RAA

TE TIA-FAAHOU-RAA O TE TINO

Uiraa 4. Eaha iā te tia-faahou-raa?

P. O te ora-faahou-raa iā o te tino i tanuhia ra, oia
hoi te ô-faahou-raa o to te taata varua i roto i te tino ta'na
i vaiho i raro i te repo, ia ora â te taata i roto i to'na huru
tahnti ore. Ua fatata hoi te tia-faahou-raa o te taata e te
faaapî-raa-hia o te ao nei. E pohe te ao nei e ei reira e ho-
roahia mai ai te tahi huru apî, e na reira atoa te tino, e pohe
te taata, vaihohia'tura to, na tino i ra ro i te repo e i te tia-
faahou-raa e rave faahou oia i taua tino ra i roto i to'na
huru hanahana.

Parau Tauturu: Ua faaaau-pinepine-hia te mau mea
no te ao nei i te tia-faahou-raa i to te taata tamataraa i te
haapapu atu ia vetahi ê i te huru mau no te reira. Ua
faaaauhia te huero moa i te reira no te mea ua haere maira
te hoé mea ora no roto i te huero, area râ e ere te reira faa-
auraa i te mea tia, no te mea aita te ora i pohe roa i roto i
taua huero moa ra. Ua na reira'toa te toé i te faaauhia; ua
haere te reira i roto i te hoé vahi, ahu atura i te hoé paruru
e ati noa'e ia'na e i te hopea ua maue mai oia ei manumanu
nainai; ia fernri râ tatou aita to'na ora i ore e no reira aita
te reira raveraa e faaaau-maitai-raa i te tia-faahou-raa.

Uiraa 5. Te nahea maira te parau papai no te tia-faa-
hou-raa!

P. E rave rahi te mau peropheta o tei tohu maira no te tia-faahou-raa. Ua parau maira te tahi no ratou no to Iesu iho tia-faahou-raa mai, e ua tohu maira te tahi no ratou no te tia-faahou-raa i te mau taata'toa. Tena ô maira Ioba e; "Ua ite hoi au e, te ora ra te faaora ia'u, e ia tae i te hopea ra e tia mai ai oia i nia i te fenua nei: e ia pohe tau iri nei i teie nei mai, e hió â vau i te Atua i roto i tau tino nei;" (Ioba 19:25) Ua ite atoa Enoha i te huru no te tia-faahou-raa o Iesu e tae noa'tu hoi i te tia-faahou-raa o te mau taata atoa. Buka Poe Taoá Rahi Mose 7:56-57.

Ua na ô maira Samuela, te hoé peropheta no te Ati Lamana e: "Inaha hoi, ia pohe oia e tia'i, ia tupu te ora; oia mau, ia pohe oia e tia'i, e e au hoi ia ia tupu te tia-faahou-raa no te feia i pohe ra, e tia'i i te taata i te tae i mua i te aro o te Fatu ra; Inaha, na taua pohe ra e faatupu i te tia-faahou-raa o te feia i pohe ra, e e faaora i te mau taata atoa ra i te pohe matamua ra, o to'na pohe varua ra ia, no te mairiraa hoi o Adamu ra' i tapeahia'i te mau taata atoa ra' eiaha ratou e tae i mua i te aro o te Atua, i raro ai ratou ei feia pohe i ta te tino nei e i ta te varua atoa ra hoi. Inaha râ, no te tia-faahou-raa mai o te Mesia e ora'i to te ao atoa nei, e tae faahou mai ai ratou i mua i te aro o te Fatu ra;" (Helamana 14:15-17-)

Ua faahapa-noa-hia Iesu no to'na aóraa'tu i te parau no te tia-faahou-raa: "I te parau râ o te ora-faahou-raa o tei pohe ra, aita outou i taió i ta te Atua i parau mai ia outou na, a na ô mai ai ra e, O vau to Aberahama nei Atua, e to Isaaka nei Atua, e to Iakoba nei Atua. E ere hoi te Atua i te Atua no te taata pohe, no te taata ora ra." (Mataio 22:31-32) Ua parau atu Oia ia Mareta e: "Ua parau mai Iesu ia'na, Tei ia'u te tia-faahou-raa e te ora, o te faaroo mai ia'u ra, pohe noa oia e ora â ia." (Ioane 11:25) E rave rahi atu â te parau Ta'na i parau mai, a hió i te Mataio 12:40; 16:21; 20:19.

Uiraa 6. Ehia tia-faahou-raa ia?

P. E piti, oia hoi, te tia-faahou-raa matamua a tia mai ai te feia parau-tia e tei haamata i te tau no lesu e tei haere â e tae noa'tu i te hopea no te meleniuma; e te piti o te tupu i te hopea no te meleniuma a tia-faahou mai ai te feia atoa te ore e tia faahou i te tia-faahou-raa matamua.

Uiraa 7. E mea nafea te tia-faahou-raa matamua?

P. "Ua riro (Iesu) ei matamua no te feia i mairi i te taoto ra." (Korinetia 12:20) "Maheu aéra te mau menema; e ua tia maira te tino o te feia moá i te taoto ra e rave rahi, i muri aé i ta'na tia-faahou-raa i nia ra, e ua haere maira ratou mai raro mai i te apoo, haere atura i roto i te oire rahi." (Mataio 27:52-53)

Ua na reira te faatereraraa i te tia-faahou-raa matamua e tae noa'tu i te tae-piti-raa mai o te Mesia, e i taua taimera e iritihia'i te mau apoo ia tia mai te feia parau-tia o tei ineine no te reira taima e ratou o te ore e ineine e tia i ratou e tae noa'tu i te mahana a oti ai to ratou tau faaineineraa, ei reira ratou e tia mai ai.

O te feia parau-tia anaé te tia mai i te tia-faahou-raa matamua e tei rotopu ia ratou te mau tamarii rii o tei pohe mai te ite ore i te mau ture; o ratou atoa ia te etene o tei ore i faaroo i te evanelia e tei pohe i roto i to ratou huru máua. "Ei reira hoi te mau nunaa Etene ra e faaorahia'i, e te feia aore ratou i ite i te ture ra e tufaa atoa i te tia-faahou-raa matamua ra." (Buka Fafau 45:54) A hió atoa i te Ezekiel 36:23-24.)

Parau Tauturu: Ua faaite maira Alama, te hoé peropheta e; "Inaha, te parau atu nei au ia oe e, aíta e tia-faahou-raa; oia hoi, e ere teie tino pohe noa e riro ei tino pohe ore, e e ore teie tino tahuti noa e riro ei tino tahuti ore hou te taeraa mai o te mesia." (Alama 40:2) Ua na reira atoa maira te mau peropheta e rave rahi, i roto i te Buka a Mo-

romona no te tia-faahou-raa mai o te Mesia e te taata atoa hoi.

Ua faahapa-noa-hia Iesu, e to'na mau Aposetolo atoa hoi, no to ratou parauraa i te tia-faahou-raa. Ua aó noa Paulo i te reira e ua papaihia te pene 15 no te Korinetia I no nia i te tia-faahou-raa.

Ua faaite maira te parau papai e, ei to Iesu taeraa mai e iritihia'i te mau apoo no te feia parau-tia, e e ravehia ratou i roto i te raí e farerei la'na i to'na haereraa mai. "Ua faaroo hoi tatou e, i pohe Iesu e tia faahou aéra i nia, oia atoa te feia e taoto i roto ia Iesu nei, na te Atua ia e faahoi mai e oia atoa ra. ***E muri aéra, o tatou o te feia ora e toe ra, e rave-atoa-hia mai ia e ratou atoa ra i reira, afaí hia'i i nia i roto i te ata, ia farerei atu i te Fatu i roto i te reva nei; a parahi mau atu ai tatou i pihaiho atoa i te Fatu e a muri noa'tu." (1 Tesalonia 4:14, 17)

Uiraa 8. Eaha te huru no te piti o te tia-faahou-raa?

P. "Aréa te tahi pae o te feia i pohe ra, ia hope taua na matahiti hoé tausani ra, i ora faahou ai." (Apokalupo 20:5) Ua na reira maira Ioane i te hopea no ta'na parauraa'tu no te tia-faahou-raa matamua; te feia parau-tia-ore râ e taoto â ratou ia oti na matahiti hoá tausani ra. Ua faaite faahou maira Ioane no te tia-faahou-raa hopea a haavahia'i te taata' toa e: "E ite atura hoi au i tei pohe ra, o te taata rii, e te feia rarahi, i te tiaraa i mua i te Atua ra; e heua ihora na buka ra; e heua ihora hoi te tahi buka, oia te buka ora ra: e haavahia ihora táua feia i pohe ra i te mau parau papaihia i roto i taua na buka ra, i ta ratou ra mau ohipa. E ua tuu maira te miti i te feia i pohe i roto ia'na ra, e ua tuu maira te apoo e hade i te feia i pohe i roto ia raua ra, haavahia ihora ratou atoa i ta ratou mau ohipa." (Apokalupo 20:12-13.)

“E teie nei, te vai nei te hoé pohe i parauhia te pohe tino: e no roto i te poheraa o te Mesia e matara'i te tapea o taua pohe tino ra, ia faatia-anaé-hia mai te taata i teie pohe tino nei: E tuati-faahou-hia te tino e te varua hoi i to'na huru mau; e e faahoíhia te mau melo e te mau tiaatiraa atoa hoi i to'na varua mau, mai to tatou nei â huru; e e faatia-hia'tu tatou i mua i te aro o te Atua, ma te ite, mai ta tatou i ite i teie nei â, e i te haamanaó-papu-raa i ta tatou atoa ra mau hara. E tae mai taua faahoíraa ra i te mau taata atoa, te taata paari e te taata apí, te títí e te tiamâ, te tane e te vahine, te feia ino e te feia parau-tia; e ere te hoé io rouru iti aé o to ratou upoo ra e moé; faahoí-tino-hia te mau mea atoa i to'na iho huru mau, mai teie to'na iho huru i teie nei â; oia hoi i roto i to'na tino, e arataihia ia e e haavahia hoi i mua i te haavaraa o te Mesia te Tamaiti, e te Atua te Metua, e te Varua Maitai, oia hoi te hoé roa ra Atua muri ore, ia haavahia ratou i tei au i ta ratou ohipa maitai e ta ratau ohipa ino.” (Alama 11:42-45)

Ua na reira maira te parau papai i te haapapuraa mai ia tatou i te faaapiraahia o te ao nei e te tia-faahou-raa o te taata. Aita râ tatou i ite i te mau mea na muri i te reira maori râ ua faaineinehia te ravea ia haere â tatou i mua noa'tu.

Uiraa 9. Teihea te vairaa o te varua taata i ropu i te poheraa e te tia-faahou-raa?

P. Te na ô maira Alama i roto i te Buka a Moromona e:

“E teie nei, te parau no te vairaa o te varua taata i ropu i te poheraa e te tia-faahou-raa; Inaha, ua faaitehia mai ia ia'na e te hoé melahi o tei na ô mai ia'na e, Ia reva'tu te varua o te taata i teie tino pohe noa nei; oia ia, te varua o te mau taata atoa ra, te taata maitai e te ino atoa hoi, ua afai-hia ia ratou i taua Atua ra o tei horoa mai i te ora ia ratou

ra. Ei reira e fariihia te varua o te feia parau-tia ra i roto i te hoé vairaa mauruuru ra, o tei parauhia e paradaiso; e vahi faaeearaa ia, e te hau, ei reira e faaea'i ratou i to ratou peapea, i te ati, e te oto hoi. Ei reira te mau varua o te feia parau-ino e te viivii; inaha hoi, aita ratou e tufaa i te Varua o te Fatu; inaha hoi, i maiti ratou i te ino, aore i te maitai; no reira i ô ai te varua o te diabol o i roto ia ratou, e ua rave to ratou tiahapa; e hurihia ia ratou i te poiri ra, tei reira te oto, e te tai, e te auauraa niho; e ua na reira, no ta ratou ohipa ino, i aratai-tîti-hia hoi ratou e te hinaaro o te diabol o. E teie nei, o te vairaa teie o te varua o te taata ino; oia ia, tei roto i te poiri ratou, e te hoé vairaa riâriâ, e te mataû, e manaóraa i te mainaina u'ana e te riri o te Atua, o te tae i nia ia ratou; e na reira noa ratou i te vairaa, e o te reira atoa te vairaa o te feia parau-tia i roto i te paradaiso e tae roa'tu i to ratou tia-faahou-raa." (Alama 40:11-14)

E ere ia paradaiso te vairaa no te Atua, te vairaa râ ia no te varua taata i ropu i te poheraa e te tia-faahou-raa. E aita atoa e tia ia tatou ia parau e, ua tia te taata eiâ ia tae i te vairaa o te Atua, no te mea e taata hara oia; area râ mai te parau a Iesu ia'na tei paradaiso raua i taua mahana ra e no reira e mea ê ia paradaiso. e e mea ê hoi te vairaa o te Atua. A hio i te Luka 3:43; 2 Korinetia 12:4; Apokalupo 2:7.

Te Taivaraa

Te vai ra te hoé mea rahi ae i te mau mea atca i roto i te Ekalesia i faatiahia e te Mesia e ta'na mau Aposetolo, i te tau tahito, e teie taua mea ra oia hoi "te tahoéraa." Ua haamatahia te parau no te hoeraa a parau atu ai Iesu i te na ô-raa e, "O vau e te Metua ra, hoé â ia." Ioane 10:30; e "O tei hió

mai ia'u ra, ua hi'o ia i te Metua." Ioane 14:9. E''Aore oe i faaroo e tei roto vau i te Metua, e tei roto te Metua ia'u." Ioane 14:10. Te mea rahi i vai i roto i to Iesu aau o to'na ia hinaaro ia riro Ta'na mau Aposetolo ei hoé mai la'na e to'na Metua. Eiaha i ta'na mau Aposetolo ana'era, te mau pipi atoa Na'na ra ia riro ratou ei hoé, o to'na ia hinaaroo mau, mai te au i ta'na pure i te ô Getesemane, ua faaite atu vau i to i'oa i te mau taata o teie nei ao ta oe i ho mai no'u ra. O ratou ta'u e pure nei. E ta'u metua Mo'a ra e, e tia i oe ia ratou i ta oe i ho mai no'u i to i'oa na, ia hoe a'eratou mai ia taua atoa nei â. Aore hoi au i pure ia ratou ana'e nei' i te feia atoa ra e faaroo mai ia'u i ta ratou ra haapiiraa. Ia riro ratou atoa ei hoé; mai ia oe, e tau Metua, i roto ia'u nei ra, e mai ia'u hoi i roto ia oe na, ia hoé atoa ratou i roto ia taua, ia faaroo to te ao e na oe au i tonu mai. Ia riro ratou ei hoe mai ia taua hoé nei; ei roto vau ia ratou, e ei roto oe ia'u, ia tia to ratou amuiraa."

Ua papu ia tatou e ua hinaaro mau Iesu ia riro ta'na mau pipi atoa ei "hoé". Hoé i te faaroo, hoé i te iteraa i te Atua, e te Tamaiti, e te Varua Maitai. Hoé i te mau oroa tei horoahia mai, e o tei faaite i te huru mau o te Evangelia faaora tei tuuhia mai e Iesu e Ta'na mau Aposetolo. O te pure teie ta Iesu iho i ani i ta'na Metua no ta'na mau pipi.

Mai te au i ta tatou i taió a'enei te ite nei tatou nei e, o te Hoéraa ia, te hoé tapao rahi o tei faaite ia tatou i te huru mau o te Ekalesia a Iesu Mesia

I tei nei mau mahana te ite nei tatou e, na rau te huru o te mau haapaoraa, e te haapii nei te tahi i ta ratou iho mau haapiiraa e te tatara nei te tahi pae i te Bibilia mai te au i to ratou iho manaó, e a na reira noa'i.

I te parau no te TAIVARAA e hió tatou i te huru o te mau haapaoraa o tei parauhia ra e, e Kiritiano. I roto i teie nei parau eita vau e faaino atu, e faaite râ vau i te huru

o te mau haapaoraa mai te tau o te mau Aposetolo e tae roa mai i teie nei. Te parau atu nei au i to te ao atoa ra e, ua taiva te Ekalesia i faatiahia e Iesu e Ta'na mau Aposetolo, e na reira te faaite nei au e, i te tumu vau i parau ai i taua parau ra.

Tei vai nei na Ekalesia e toru e to ratou mau amaa o te haapii ê te parau i roto i te Bibilia i nia te huru o te Ekalesia i faatiahia e Iesu Mesia e Ta'na mau Aposetolo. Teie to ratou mau i'oa i raro nei, Te Ekalesia Katolika Roma, te Ekalesia Helleni, e te Ekalesia Porotetani e to'na mau amaa e rave rahi.

Te Ekalesia Katolika Roma.

Te parau nei te Ekalesia katolika Roma e, e mono mau oia no te Ekalesia faatiahia e te Mesia e Ta'na mau Aposetolo e tei taua Ekalesia ra te mana e te mau mea e hope roa'e. Iritihia na roto mai te buka ("Catholic Belief" by the very Rev. Joseph Faa D. Bruno D.D. chapter xxxii.

E te faaite faahou mai nei taua buka ra e, "Tei te Ekalesia Katorika anaé te mauraa o te mana no o mai te mau Aposetolo ra ma te mutu ore e tae roa mai i teie nei, (i te tau no te Pope Leox III 1878-1903)

E mau parau rahi tera mai te mea e tano, e mai te mea ua papu.

Te Ekalesia Helleni.

Ua patoihia te parau e te mau titauraa o te Ekalesia Katolika Roma e te Ekalesia Helleni. Ua na ô mai te Ekalesia Helleni e, "O vau te Metua Vahine o te Ekalesia Kiritiano, no te mea i muri ae i te poheraa o te Mesia ua tau-turu matou i te mau Aposetolo i te faatiaraa i te Ekalesia, e no reira tei ia matou te mana mau ra, mai te mutu-ore-hia no o mai i te mau Aposetolo a te Mesia, no reira ua riro matou ei Metua Vahine no te Ekalesia Kiritiano. ("The worlds

Parliament of Religions'') by John Herry Barrows, D.D.

I te tenetere 9 e tae roa mai i te tenetere 11 ua vai noa ra te maroraa e te peapea i rotopu na Ekalesia e piti oia hoi, te Ekalesia Helleni i te hitia o te rā, e te Ekalesia Roma i te tooa o te ra. Ua katarahia te mau Patereareha e te mau Epitekopo no te Ekalesia Helleni e te mau Pope no Roma e ua katarahia te mau Pope e te mau Epitekopo no Helleni. Ua parau to Roma ua taiva to Helleni e ua parau atoa to Helleni e ua taiva to Roma. I te matahiti 1054 ua taa e raua e tae roa mai i teie nei.

Papaihia e Gihoti Borobiti

Te Mau Parau Apî

E TAPARAHIRAA TAATA

I te fenua Mexico, te tiaî nei te hoé taata, o Francisco Finbers ia to'na i'oa no te haamataraa o te tau mahanahana e i reira oia, e to'na mau hoa, e taparahi ai te hoé pupu Inidia. Te tumu oia i hinaaro ia taparahi i teie feia Inidia ra, no te mea e, e toru matahiti i mairi ae'nei, ua tae teie pupu Inidia i to'na fare i te hoé taime a rave ai oia i te ohipa i te tahi vahi ê, e ua taparahi pohe roa ratou i ta'na vahine, e ua êia ratou i ta'na tamaiti. Mai te reira taime mai â, ua imi Francisco Finbers i teie pupu Inidia, e i teie nei, ua ite oia i to ratou vahi faaearea. Area ra, no te toetoe e te hiona atoa hoi, aita i nehenehe ia'na ia rave i teie nei te ohipa i opuahia e ana ra, e tiaî ra oia no te tau mahanahana. Tei roto i to'na rima te parau faatia na te Hau Mexico ia rave i teie nei ohipa taparahi taata ra. Ua horoahia teie parau faatia, no te mea ua pinepine teie pupu Inidia i te taparahiraa i te taata. Teie te rahiraa o teie pupu, oia hoi, mai te huru e 15 tane e to ratou mau vahine e to ratou mau tamarii.

NA OROMETUA API

I teie pahi vea i mairi a'enei, ua tae mai, no Amerika mai, na Orometua api. O Manuela ia te i'oa o te hoé e o Lui ia te i'oa o te tahi.

E HUNARAA MAI

Aue te aroha e, ia mataitahia te afairaa o teie mau mai i to ratou menema. I te oire Roto Miti i Utaha, i teie avae i mairi ae nei, ua haaputuputuhia te mau pereoo uira tahito roa i te hoé vahi, e i reira, ua faanehehehia teie mau pereoo no to ratou iho mau hunaraa. Ua papaihia te hoé mau parau faaite i nia i teie mau pereoo tahito ra, oia hoi, ua faaitahia to ratou mau mai a maitihia'i ratou no teie hunaraa huru ê. Ia oti te faaneheheraa, ua faaterehia teie mau pereoo, hoé hanere ra, i nia i te purumu rahi i Roto Miti, e ua afai-roa-hia ratou i rapae au i te oire. I reira, ua amuihia ratou i roto i te hoé pueraa, faatahe-atura-hia te gasoline e te hinu i nia ia ratou, e ua tutuihia te taatoaraa i te auahi. Te tumu i ravehia'i teie ohipa ra, no te mea, ua riro teie mau pereoo uira tahito ei fifi no te mau pereoo uira maitai. E mea pohe noa to ratou mau machine, e no te rahiraa o te mau pereoo, aita atura i nehehe i te mau pereoo atoa i te haere i to ratou mau haereraa. Te tahi atoa, aita i itehia te mahana e parari ai te hoé pae, e a riro ai to ratou parariraa ei tumu no te poheraa o te hoé mau taata.

M. Bonnet M. Gerant et Imprimeur,

Rue Brea et de la rue Dumont d'Urville, Orovini. Papeete